



Ingar Støyle Bringsvor

Saksbehandlar, innvalstelefon

Bjarne Otnes, 71 25 85 75

Dispensasjon for bruk av drone til taksering av havsule 2024 - Runde fuglefredingsområde - Herøy kommune

Bakgrunn

Ingar Støyle Bringsvor søker 21.04.2024 om løyve til å bruke drone til taksering av havsulekolonien på Runde i 2024. Det er søkt om ei flyging i månadsskiftet juni/juli og ei i månadsskiftet juli/august. Takseringa inngår i det nasjonale sjøfuglovervakingsprogrammet SEAPOP, og gir data om totalbestand og ungeproduksjon. To flygingar gir eit betre datagrunnlag i tilfelle fugleinfluensa slår ut i kolonien.

Lovgrunnlag

Søknaden er vurdert opp mot gjeldande verneforskrift, fastsett ved kongeleg resolusjon 30.04.198. Verneforskrifta for Runde fuglefredingsområde har ikkje forbod mot bruk av drone/modellfly. Kapittel IV bokstav a slår derimot fast at: *Alle fuglar og pattedyr med unntak av villmink er freda mot skade og øydelegging av ein kvar art. Dette gjeld og uroing av fugl eller fugleungar på eller ved reir, eller fugl med ungekull.* Statsforvaltaren legg til grunn at bruk av drone i perioden med ferdselsforbod 15. mars til 31. august vil kunne skade og uroe fugl i strid med dette forbodet. Utanfor denne perioden vil det avhenge av ei konkret vurdering av ev. fuglekonsentrasjonar og korleis drona blir operert om flyging vil vere i strid med forbodet.

Statsforvaltaren kan gi dispensasjon frå verneforskrifta dersom det ikkje strir mot verneformålet og ikkje påverkar verneverdiane nemneverdig, jf. § 48 i naturmangfaldlova (nml). Søknaden må også vurderast etter prinsippa i naturmangfaldlova §§ 8-12, jf. § 7. Prinsippa omfattar vurdering av kunnskapsgrunnlag (§ 8), føre-var-omsyn (§ 9), samla belastning (§ 10), kostnader for å hindre skade på naturmangfald (§ 11) og miljøforsvarleg teknikk/driftsmetode (§ 12).

Statsforvaltaren si vurdering

Formålet med vern av Runde fuglefredingsområde er å ta vare på eit rikt og interessant fugleliv og fuglane sitt livsmiljø, særleg med omsyn til sjøfuglkoloniane.

Statsforvaltaren legg til grunn at takseringa gagnar forvaltninga av havsulebestanden i fuglefredingsområdet, Møre og Romsdal og nasjonalt. Dette bidrar til å sikre naturmangfaldverdiane, og til å oppfylle verneformålet. Havsule har hatt god bestandsutvikling over fleire år, men



fugleinfluenta er ein ny trusselfaktor siste åra. Bilde av plastforsøpling og plastdrepne havsuler på Runde, mellom anna frå søkar, har gitt merksemd og bidrar til innsats som kjem heile økosystemet på kysten til gode. Fleire av sjøfuglartane på nordvestlandet har hatt små hekkebestandar og liten ungeproduksjon i fleire år. Det er då vesentleg å unngå nye belastningar, jf. nml § 10. Vi finn likevel at bruk av drone som føresett i søknaden ikkje gir nemneverdig forstyrring og tilleggsbelastning, og verdien av resultata overgår ev. skadeverknader av kartleggingane. Søkar har lang erfaring med bruk av drone i sjøfuglkoloniar, og god kunnskap om korleis flyginga bør gjennomførast for å minimere forstyrring av fugl.

Av omsyn til publikum og risiko for at bruk av drone i området kan få smitteeffekt (nml § 10), set vi vilkår om at mannskap må vere tydeleg merka/uniformert slik at det går godt fram at aktiviteten har vitskaplege formål (nml § 12). Tilsvarande skal Statens naturoppsyn haldast orientert om aktiviteten slik at dei kan svare på ev. spørsmål.

Kunnskapsgrunnlaget som ligg til grunn for vedtaket vurderer vi som tilstrekkeleg til å gi dispensasjon, jf. nml § 8. Føre-var-prinsippet (nml § 9) får ikkje vesentleg vekt. Vi ser ikkje behov for særskilt vurdering etter nml § 11.

Vedtak

Statsforvaltaren i Møre og Romsdal gir Ingar Støyle Bringsvor dispensasjon for å bruke drone til taksering av havsule i havsulekolonien på Runde. Heimel for vedtaket er § 48 i naturmangfaldlova.

Vilkår

- Dispensasjonen gjeld for nødvendig tal flygingar i månadsskifta juni/juli og juli/august 2024.
- Mannskap skal vere tydeleg merka/uniformert med t.d. signalvestar slik at det går godt fram at aktiviteten har vitskaplege formål.
- Kopi av denne dispensasjonen skal vere med og visast fram ved behov.
- Statens naturoppsyn skal vere orientert om aktiviteten etter nærare avtale direkte dit. Kontaktperson i SNO: Michael Eklo, 91594910/michael.eklo@miljodir.no.

Anna lovverk

Vi gjer merksam på at vedtaket berre omfattar dispensasjon i medhald av naturmangfaldlova frå verneforskrifta for verneområdet. Nødvendige løyve etter anna lovverk må avklarast med rette myndigheiter.

Klage på vedtaket

Partane i saka eller andre med rettsleg klageinteresse kan klage på vedtaket innan tre veker frå det er mottatt. Klagen må vere grunngitt, og skal sendast til Statsforvaltaren. Miljødirektoratet avgjer klagen dersom Statsforvaltaren opprettheld vedtaket. Reglane om klage på vedtak går fram av kapittel VI i forvaltningslova.

Med helsing

Linda Aaram (e.f.)
underdirektør

Bjarne Otnes
seniorrådgivar

Dokumentet er elektronisk godkjent